

Pablo Jesúsgin-kwenamalad Filiposgin-pukmaladga Karta Palmijad

Filipenses

Imi Pablo kepegin neg-kwebur-Filiposgin Pab-kaka-nuegangin chunmadi-kus. Tenal teun tulemal oturdaleged-neggin Pablo tegin Silas-odosmal (Hechos 16.) Imi Filipos Romano-neg-kwebur-totogwadga chii. Tenal Filipos Europa-togedgin chimo. Al tulemal Filiposzhe irmanonidamal ichejul-immalmal ukegal. Tenal tulemal-tetual-ampagusmalad Filiposzhih ol-egwasmal.

Imi Pablo Romagin oturdaleged-neggin-mellejiidgin kwenadgan-Filiposgin-pukmalad Pablo-pilaledbal machi-Epafroditos-palmismal Pablo-pentagal, tegin Pabloga mani palmismalbal. Al Pablo yer-itogedgin kwenadgan-Filiposgin-pukmaladga Pab-Purpa-Nuedbal karta nermas tog-nuedi choggal. Pitomalgu.

1 Imi antin-Pablo tegin Timoteo anmal-walbogwad Jesucristoga-arpamalad. Imi anmal pemal-Filiposgin-pukmalad-Jesucristogin-akenanimadga, tegin tule-Jesúsgin-penzhulmalad-iktumaladga, tegin tule-Jesúsgin-penzhulmalad-pentamaladga karta wis palmijimalmo.

²Imi Pab-Tummad-anmal-pab, tegin Pab-Jesucristo pemalga immal-nuegan-imakelen, nabirin, tegin ulubgin akalzhul-itogal pemal-imakelen, nabirbalin.

Pablo Filipos-tolganga Pabzhe kochad

³Imi an pemal-ebinzhealil, an keg-chulgu Pabga tog-nuedi chogalda. ⁴⁻⁵Imi pemal kepe-akar

imisgwadzhe ampa anpak mes alamadi-kusmal an Pab-Jesús-kaka-nuegangin chunmagal. Al an Pabzhe kolalil, an weligwaledgin pemalga Pabzhe kolalda.

⁶Imi an Pab-kwen-penzhuldo, Pab Tummad kepe-akar imisgwadzhe pinna-pinna pe-ogwamai. Tegin Pab ampa ukin-nadgu pinna-pinna pe-ogwanatapbalo Jesucristo itinapche kannan tanikoedzhe, pe pellallé ogwaledgedzhe.

⁷Al an naga ulubgin pemal-pilaledbal antin, an takto an pemalgin immal-chogzhaddin, ib-nued. ¿Ibigan an teob chog? Nabir. Imi an meke oturdaleged-neggin mellejiil, o an meke Pab-Jesús-kaka-nuegan-irwal kwisguel, o

meke an chogzhabalil Pab-Jesús-kaka-nuegan ib-chunchunnad, pemaldin ampa an-pakamalad.

Tenal Pab wilejakwa pemal-taked-wilubzhulinadbal Pabdin yabli wilejakwa pemal-taknonimalmo.

⁸Tenal Pab Tummad an-nued-wisdo, an peydzhe pemal-takpi-kudii, Jesucristo-pemal-pilal-kujadyobmo.

⁹Al an pemalga Pabzhe kolalil, an Pabzhe ekisalda, pemal Pab-Jesús-igal-wijiidbal tegin pe yer nono-nikadbal pemal pul-pule aga pilalgumalalen, nabirin.

¹⁰Tenal an pemalga Pabzhe ekisnaibal pemal mag itomalgal piti-igal pul-napírra, pemal chwilidik nanegal. Al Cristo itinapche kannan tanikil, pemalga immal-choged kwen nikchul-kuo.

¹¹Al pemal Pab-Jesucristo-igalbal nued timalal, pemal kep Pab-kannaleged-oyomalo. Tegin Pab pemalbal pul-tule-tummadyob taklego, tegin Pab pemalbal peydzhe otummolenonibalo.

Pablo oturdalemaidgin Pab-kaka-nuegan chognaid

¹²Jesúsgin-kwenamalad, imi an pemalga wisgal chogdo, anka-immal-kujad anka ib-nuedga kus. Imi pemal ebinzhemal, an oturdalemaidbal Pab-kaka-nuegande pal kwen mimilegojul. Chulá. Imi Pab-kaka-nuegan pul-pule mimilego. ¹³Imi chulubmal-Romano-tummad-César-neg-takmaladgin-pukmalad an-wismal, tegin tule-pimalad-pel-kwapa an-wismalmo, antin Pab-Jesúsbal-naid-ulgin oturdalemai.

¹⁴Imi Jesúsgin-kwenamalad oturdalemai an-itosmalgu, pel-kwablejal pul-pule Pab-Jesúsgin-penzhulidgin kannalesmal, tobzhulidgin Pab-kaka-nuegangin chunmagalmal.

¹⁵Tenal an wisdo, tulewal-walgwen an-pentagal

Pab-Jesús-igalgin kwen chunmananijulmal. Tenal we kwenamalad istar an-takmaladbal tegin anka-pul-tule-tummadga-kubiedbal Pab-Jesús-igalgin chunmananimalbal.

Tenal kwenadgan-pimaladdin yer an-takedbal Pab-Jesús-igalgin chunmananimal. ¹⁶Tegin kwenamalad-nabiridbal-chunmananimaladdin wismaldo, Pab an-amis, itigin oturdalemaidgin e-kaka-nuegan-irwal chunmagal. Al we kwenamalad an-pilaledgin Pab-Jesús-kaka-nuegangin chunmananimal.

¹⁷Tenal kwenamalad-istar-an-takmaladdin aga tukin tule-tummadga-kubiedbal Jesús-igal-nueganbal chunmananimal. Tenal we kwenamalad napírragwadgin kwen chunmananijulmal, pinche ib-chunnadyob chunmananimal. Tenal we kwenamalad ebinzhemal, emalde Jesúsbal-chunmanaidgin, an-oturdalemaidgin anka pul-kigma wileged onomalo.

¹⁸¿Imisgin igi an chao? ¿An urwo o an urwojul? Ankadin ampa iwen-kwen-akalzhu, tulemal meke askin pinche chunmananimal, o nabiridbal chunmananimal, ankadin ampa yopí. Tenal ankadin pul-chunchoged Pab-Jesús-kaka-nuegan pul-pule mimile. Tenal Pab-Jesús-kaka-nuegan-mimilemaidbal an welido.

Pablo aga mag itojad, ega kujal igi kuoed

¹⁹Imi an nued wisdo, pemal anka Pabzhe koledbal, tegin Pab-Jesús-Purpa-Nued an-pentakedbal, ankin immal-kunaid pelgunoniko. Al an pela-pela welguji.

²⁰Tenal an chogde, an naga penzhulidyob, tegin an peydzhe peigujiidyob an kwen pinkeguojul; tenal an akpene unnigujadyob an imisgin tobzhulidgin unnigubalo. Al an meke tullego, o an meke

purko, Cristo anpal otummoledi-kuo. ²¹Tenal an tula-tiil, Jesucristoga tula-tio. Tenal an purkwijal, anka pul ib-nuedga kunoniko, an Pab-Jesúsbak mes megnegal. ²²Tenal an tuladibalil, an pul untar Pab-Jesúsga arpago. Al an wichulzhundo, an-chogbo-chogzhiid, piti pul an chuo.

²³An purkwijal, anka pul-ib-nued, an Pab-Jesúsbak mes megnegal.

²⁴Tenal an tula-kudibalil, pemalga pul ib-nuedga kunoniko. ²⁵Al antin naga mag itodo, an pemalbak yabli peine, pemal pul Pab-Jesús-igal wisgugal, tegin pemal pul-pule yer itomalgalbal. ²⁶Tenal an ampa tula-tiil, an pemalzhe kannan natapil, pemal an-tuladbal Pab-Jesucristogin welgumalo.

²⁷Al anka meke-igi kunonikil, pemalgin chii Cristo-igal-nuegan-mamikidbal nued nanemalgal. Al an pemalbak mail, o maichulil, an pemal-itogalil, pemal pulakwa pinzheed-choggwénnagwadgin nanebukmal, tegin pemal tulemalga pulakwa kaka-choggwénnagwadgin Jesús-igal-nueganbal chunmananimalbal.

²⁸Tenal pemal tobzhul tule-istar-pe-takmaladga chunmananimaladbal tule-istar-pe-takmalad mag taknonimalo, emalde pelgunonimalo, tenal pemal Pab Tummadbal abonolenonimalo.

²⁹Tenal Pab Tummad pemalga igal-kwen-ukchajul. Pab-Jesúsiginbi ibzhegalbi, tenal pemal Pab-Jesús-nuggin wilegalbal.

³⁰Imi antin pemal-yopí wileged-abalgin alamanaimo. Tenal pemal akpene igi an-takchádin an wilemai, imi an ampala wilemai.

Jesúsigin-ibzhemalad

Jesucristo-pinzheediyob aga emal-emal pinzhemaloed

2 Imi pemal Pab-Jesúsbak-mes-tiidbal okannolediil, tegin pemal Pab-Jesús-pilaledbal yer-itodiil, tegin pemal Pab

Purpa Nuedbak tiil, tegin pemal ankin-pinzheedgin wilejakwa an-taktiil, ²pemal pela-pela weligwal an-imako. Al pemal aga pulakwa naneenabmal, tegin pemal aga emal-emal yopí pilalguenabmal, tegin pemal aga choggwénnagwadgin yopí pinzheenabmalbal.

³Tenal pe melle tule-tummadga-togbiediyob immal imako, tegin pe melle tummarba-itogedgin immal imamalbal. Tenal pemal melle tule-tummaganyob nanemalo, tenal pemal aga emal-emal tule-tummaganyob takmalo. ⁴Imi pemal melle aga tukinbi pinzhemalo, tenal pe tule-pimaladgin ampa pinzheenabmalmo.

⁵Tenal pemal Pab-Jesús-pinzheediyob pinzheenabmal.

⁶Imi Jesucristo

Pab-chunchunnaddindo, tenal Jesucristo kwen pinzhaszhul-kus, Pab-Tummad-yopí tummadga nanegal.

⁷Tenal Jesús iti-napche tuleyob mimmilenonigu, tule-pinchegadga aga imas, tegin tule-mosyob kudigusbal.

⁸Tenal Jesús iti-napkin tuleyob tigusgu, tule-tummadzhulidyob aga imas, tenal Jesús aga e-Pab-pallí ibzhedi-kusbal e nakrusgin purkwijadzhe.

⁹Al Pab Tummad pul-tule-tummadga Jesús-odos. Tegin Pab Tummad Jesúsga, egmal-tulemalga pul nug-tummad ukchabal.

¹⁰Te-ulgin tule-nikpa-negginmalad, tegin tule-iti-napkinmalad, tegin tule-napil-ulpal-mamimalad Jesús-takalmalal, Jesús egmalga-pul-tule-tummaidiidbal Jesúsga chimtinonimalo,

¹¹ tegin we tule-chogpágwad-
pel-kuwapa
aga tu kin chogdamalo:
“Pedin-Jesucristo,
Pul-Tule-Tummad.”
Al tulemal-Jesúsigin-
chognonimaloedbal,
Pab-Tummad-nug pela-pela
otummolenoniko.

Jesúsigin-kwenamalad oyonaid Pab-igaldin igi mai

¹² An-aimal, an-pemal-pilalmalad,
imi an pemalbak maigusgu, pemal
an-choged-pallí nanedi-kusmal.
Imi an pemalbak tikajulgus
maichulidgin pemal pul-pule
an-choged-pallí nanedimalbal. Al
pemal Pab-tobedgin, tegin Pabgin-
atagedgin tegin pe abonolejadgin
pe nuekwa takenabmal pe nued
nanebukmal-dewa.

¹³ Tenal Pab pemal-ulubgin
e-itolegedbal arpanaidbal, pemal
Pab-choged-pallí nanebi-kudamalo.

¹⁴ Tenal pe melle chochoedgin
immal imako, tegin pe melle
tulebak abin-abinidgin immal
imabalo, ¹⁵ pe tule-napírragwadga
kugal, tegin tulemal melle
pemaalgin ib-choged nikugal. Al
pemal tule-iskana-abalgin, tegin
tule-immal-akalosmalad-abalgin,
pe Pab-nuskanyob immal-
akaloszulidgin kudigumalo. Tenal
an-pemalga-chogzhadyob pe
nanedimalal, iskwa neg-chichidgin
kaedyob pe neg otalomalo.

¹⁶ Tegin pemal Pab-Jesús-
kaka-nuegangin tulemalga
chunmananimalo, igi nabir purpal
tullemalo. Al Cristo iti-napche
kannan tanikil, antin, an yer-
itogedgin pemaalgin chogo: “An
pinche kwen nanedi-kuszhu, tegin
an pinche kwen arpaszhuibal.”

¹⁷ Tenal pemal Pabgin kwen
penzhulmal, tegin pemal Pabga
arpamalbal Pabga-immal-ukedyob.
Tenal an purkwenonikil, antin Pab-
Tummadga-immal-ukchad-askin

napi-nis eyonaidyob kunoniko.
Al antin yer-itononiko, tegin an
pemalbak mes welgunonimogo.
¹⁸ Al pemal yer-itogenabmal, tegin
pe anpak mes welgunonimalmogo.

Pablo Filiposzhe Timoteo-palmineed

¹⁹ Imi Pab anka igal-ukchal,
an imichal pemalzhe Timoteo-
palminatapo. Tenal an
pemal-wisgujal pemal nuekwa
Pab-Jesúsibak nanebukmal, an yer
itononiko.

²⁰ Tenal antin tule-pid-pal-nikchul
pemal-pentagal. Tenal Timoteobi
napírra pemal-pentabi-kunaimo.

²¹ Tenal tule-pimaladdin aga tu kinbi
pinzhemal, Pab-Jesucristo-tulemal-
pentabiedyob kwen pinzhejulmal.

²² Tenal pemal pato wismaldo,
Timoteo igi nane. Imi Timoteo
peydzhe Pab-kaka-nuegan-
chogedgin an-pentadi-kus,
an-machi-chunchunnadyob.

²³ Imi an nuekwa wisgujal anka
igi kunoniko, kep an pemalzhe
Timoteo-palminejun. ²⁴ Tenal
an penzhuldo, an imichal Pab-
chogedbal pemalzhe natapmogo.

Pablo kannan Epafrodito-palmijogalid

²⁵ Imi an takto, an pemalzhe
pul-nabir kannan kwenad-
Epafrodito-palmio. Imi we machi
an-pakad, tegin anpak-mes-
arpedbal. Tenal we machi anpak
mes alamasbal Pab-Jesús-kaka-
nuegan palchoggal. Tenal pemal
nugu-pinzheedbal anka Epafrodito-
palmismal an-pentagal.

²⁶ Imi Epafrodito peydzhe
pemal-takpi-kudii. Tenal pemal
e-wisgusmaladbal ede yegus,
al Epafrodito peydzhe pukib-
itononibal.

²⁷ Imi pemal nabir wisgusmaldo,
Epafrodito peydzhe-pakal yegus,
iche-napi purkwenen. Tenal Pabdin
wilejakwa-Epafrodito-takchadbal

kannan Epafrodito-okwichisbal. Tenal Pab wilejakwa Epafroditoginbi pinzhaszhul, tenal Pab ampa wilejakwa an-takchamo, an melle twagdar peyedzhe pukib-itogal. ²⁸Al an pemalzhe kueye-kueye Epafrodito-palmine pemal Epafrodito-takalmalal, pemal weligwal itomalgal, tegin an melle pukib-pal-itogalmo.

²⁹Tenal pemal Jesúsgin aga kalgwenadyob ampokaal weligwaledgin Epafrodito-abingemalo. Tenal pemal tule-Epafroditoyobmalad pe otummoenabmalbal. ³⁰Imi Epafrodito Pab-Jesúsga arpanaid-ulgin, iche-napi purkwenen pemal-anal aga tukin igal-puledgin togzha an-pentagal.

Kwenadgan Jesúsgin penzhulmalad

3 Nabirdo, Jesúsgin-kwenamalad. Imi pemal, pe Pab-Jesúsgin welgumalo. Imi an teun akpene pemalga chogzhadyob an kannan pemalga chogbal. Tenal ankadin ampa iwen-kwen-akalzhu an kannan pemalga choggal pemalga pul ib-nuedga kunonigal.

²Tenal pemal wijirmal, tule-iskana-igal-pid-nikmaladzhe. Imi we tulemal tule-iskanamal. Tenal we tulemal kalagwenzhu aga abgan-tuku chiknanimal Pabbak naigugal.

³Tenal Pab-igal-napirragwad we tulemal-chogedyob kwen chogzhul. Tenal we tulemal pinche aga abgan-tuku-chikedgin yer itomal, tenal anmaldin sanal naga immal-imakedgin kwen ibzhejulmal. Imi annal chunchunnad Pabgaddo.

Al Jesús annalga purkwijad-ulgin, annal yer itomal. Tenal annal Pab Purpa Nuedbal Pabzhe-koledgin Pab-otummonanimalbal. ⁴Imi an we tulemalyob sanal nanebielen, an tule-chunnadbal an akalzhul we tulemalyob nanemogoen.

Imi an tule-igalzhihktin an tule-abgan-tuku-chikalmaaladga pul tule-chunnadga mai. ⁵Imi antin, an-mimmilejad-ibapábakkin abgan-tuku-chikles. Tenal antin Israel-tule-chunnad. Tegin an-igalbal Benjamín-e-wagwa. Tegin an tule-chunnadbal. Tegin an Pariseoga kudigusbal Moisés-igal-mamikidbal inniki nanegal. ⁶Tenal an pela-pela chabzhul tule-Pab-Jesúsbal-nanimalad-imas, tule-Pabbal-nanimalad melle Moisés-igal igemalgal. Imi an Moisés-igal-mamikidbal inniki nanediidbal, tulemal ankin choged kwen nikchulmal an noal nanedii.

⁷Imi an akpene yer Moisés-igalmal taktiin. Imi an Pab-Jesúsbal-naigunonikidbal, Moisés-igal anka ib-keg-kuedga kunonijun.

⁸Teginbal, an takto an-akpene-pel-kwapa-yer-immal-itodi-kujad, anka ib-keg-kuedga kunoni. Tenal an Tummad-Jesucristo-wisgunonikidbal anka ibi-nuedga kunoni. Tenal an Jesucristobal-naigujadbal immalmal pél periengunonibal. Al an akpenegwad-igalmal an turwayob taknonijun, an-akpenegwad-igal-igejadbal an nuekwa Cristobal naigunonigal.

⁹Imi an peido Pab-Jesús an-taktanikoedgin an ampa Pab-Jesúsbal kudii, Pab Tummad tule-iskuud-nikchulidyob an-taknonigal. ¿Ibga Pab iskuud-nikchulidyob an-taknoniko pe ebinzhe? ¿An Moisés-igalgin immal-akaloszhu lidgin nanajadbal? Chulá. Tenal an-Jesucristogin-penzhulidbal Pab Tummad tule-iskuud-nikchulidyob an-taknoniko.

¹⁰Tenal antin pul-pule Jesucristo-wisgubi. Tenal Jesucristo e-kannalegedbal kannan tullejad an itobimo. Tenal Cristo-wilejadyob an wilebimo, an Jesús-purkwijadyob purkwedzhemo. ¹¹Al an purkwijal,

an kujal meke-igi purkwaled-akar an kannan tullegenabbal.

Jesúsgin-penzhulmalad Pab-Jesucristo-igalgin alamananimal pel-kwapa turdagal

¹²Imi antin keg chogel, an Pab-Jesucristo-igal pato pelos an ib-nueganbi ima. Tenal antin ampa napido. Al antin, an pane-pane alamanai Jesucristo-peigujiiyob nanegal. Imi akpene Jesucristo an-amis, e-choged-pallí nanegal.

¹³Jesúsgin-kwenamalad, imi an naga tukin takmodo, an Pab-peigujiiyob ampa an kwen omojul. Tenal an akpene immal-imajadgin an pal kwen pinzhejul. Imidin an alamanaichundo Pab-peigujiiyob nanegal, ¹⁴tule abarmanaidgin aga pengunaidyob, toa inzhel aga omomalo. Imi an omojal, an-Jesucristobak-nued-kudiidbal Pab-neggin anka immal-nuegan uklego.

¹⁵Tenal pemal-Jesucristogin-pinzheed-nikumamimalad ampa an-yopí pinzheenabmalmo.

Tenal pemal-wal-walgwen an-chogzhadyob ampa kwen pinzhejulil, Pabdin wisgugal pe-imako, anyob pinzhegal. ¹⁶Tenal pemal piaje Pab-Jesús-igalgin turtásdin, pe teje naneenabmalmo.

¹⁷Kwenamalad, imi pemal antaedyob pe taenabmalmo. Imi an pemal-waglik megwisgu, an nanedi-kujadyob, pe tulemal-takalil, pe we tulemal-pallí pe tamalmogo.

¹⁸Tenal an akpene pemalga melugus chogzhagus, tenal an kannan pemalga chogbal, tenal poed-abalgin: imi tulemal-ichejul istar timal; tenal we tulemal Jesucristo-nakrusgin-purkwijad-igalbak aichulmal. ¹⁹Tenal Pabdin kujal sapejul we tulemal-oturdanoniko.

Tenal tulemal-Cristobak-aichulmalad mas-kunnedginbi pinzhedimal, Pab-immalmalgin

kwen pinzhejulmal. Tenal we tulemal e-istar-tiidgin aga pinkegued-wiluban, tenal imidin we tulemal pul yer e-istar-tiid takmal. Tenal we tule-iskana itina-pkined-igalginbi pinzhemal.

²⁰Tenal anmaldin itina-pkined-igalgin kwen pinzhejulmal. Tenal anmal Pab-neggin-megmaloedgin pinzhenanimal. Tegin anmal tule-Pab-neg-akar-tule-abonoed-tanikoed-abintabukmal. Tenal tule-anmal-abonoeddin anmal-Tummad-Jesucristo.

²¹Tenal Pab-Jesucristo e-kannalegedgin pel-kwapa immalmal-kani chii. Tenal Pab-Jesucristo ampa we kannalegedbal eyobidzhe anmal-chan-pole ogwago, e-chan-keg-pelguedzhemo.

Kwenadgan Pabgin pane-pane welguenabmal

4 Kwenamalad, an pemal-pilalmal, tegin an pemal-takpimalbal. Tegin an pemalgin welgujui, tenal antin, an-olo-kurkinyob pemal-takmalbal. Tenal an pemalga Pab-Jesús-igalgin chunmadi-kujadyob, pemal kantik Pab-Jesúsbak nanemalo.

²Imi antin omegan-walbogidzhe wilenai, Evodia tegin Sintiqueje.

Imi pemal Jesucristobak-nanimaladbal aga igal-nudamalo.

³Tegin an-ai-nued-anpak-arpagedga an chogmo; imi pedin we omegan-walbogwad-wis-pentako aga yopí pinzhemalgal. Tenal we omegan anpak tegin Clementebak tegin tule-pimaladbak mes alamasal Pab-Jesús-igalgin chunmagal. Tenal tulemal-anpak-mes-arpadikusmalad Pab-neggin pato nug nermakal mai ilagwen meggal.

⁴Tenal pemal pane-pane Jesucristogin welgumalo. Tegin an kannan pemalga chogbal, pe welgumalo.

⁵Tenal tulemal mag pe-takemalgal, pe tulemalbak pinnallé

nanemalo. Tenal Pab-Jesucristo-kannan-tanikoed pato omodani.

⁶Tenal pemal melle nue chulipinze itomalo. Tenal pemal Pabzhe-koledgin, pe Pabga pél immal chogenabmal, tegin pe Pabzhe pél immal ekisenabmalbal. Tegin pemal Pabga tog-nuedi chogenabmalbal. ⁷Tenal an-chogzhadyob pe Pabzhe immal ekismalal, Pabdin tule-aku-itogedzhe Jesucristobal pe-ulubzhe, pe-pinzheedzhe, pemalga akalzhul-itogal pe-imako.

⁸Kwenamalad, imi an pemalga napi chogdo: pemal igal-nueganinbi pe pinzhemalo; pe igal-chunchunnadginbi pe pinzhemalo, tegin pe tulegin-ataged-igalginbi pe pinzhemalo, pe igal-napírragwadginbi pe pinzhemalo, pe igal-ilagwenadginbi pe pinzhemalo, tegin pe igal-yer-tule-imakedginbi pe pinzhemalo, tegin tule-igal-yer-chunmamaladginbi pe pinzhemalo, tenal meke-ibi-igal-nued otummoledi-kugal, we igalmalginbi pe pinzheenabmalbal.

⁹Tenal pemal ankin turdajad-yopí, tegin pemal an-takchad-yopí nanedii, tegin pemal an-itojad-yopí, pemal ampa pane-pane naneenabmalmo.

Tenal pemal an-chogzhadyob naneel, Pab-ulubgin-akalzhul-itogal-tule-imaked, pemalbak mes tio.

**Pablo ega-mani-uklejadbale
tule-Jesús-gin-penzhulmaladga
tog-nuedi chogzhad**

¹⁰Tenal pemal tikajulgu an-kwen-pentaszulmal. Imi pemal kep kannan an wis pentanonimalbal. Al antin Pab-Jesús-ga tog-nuedi chognoni. Tenal an pemalgin keg chogel, pemal an-igesmal. Tenal an wisdo, pemal an-pentabien, tenal pemal keg kugusmal. ¹¹Imi an pemalga

chogzhiid, pe melle pinzhemalo an pemalzhe immal ekichi. Tenal anka immal-kwen-akalzhul an igi mai, tenal antin pato turdas meke-igi meggal.

¹²Tenal antin pato turdasbal, nued meggal, tegin pollé meggalbal, anka iwen kwen akalzhul. Imi an imme tiil, o an ukul mesdiil, ampa anka iwen kwen akalzhul, ankadin pél nabiritkibi. Imi anka immal unnil, o ampa anka immal akuel, anka ampa nabir. ¹³Tenal Pab-Jesús an-okannoedbal pel-kwapa an unnio.

¹⁴Tenal an-wilenaiddin pemal yabli anka ib-nued imasmal, tegin an-pentasmalbal.

¹⁵Filipos-tolgan, tenal pemal annued-wismal, an Macedonia-akar nadgu, an Pab-Jesús-kaka-nuegan palchoggal an nad. Tenal teun-akar imisgwadzhe, iglesia-pimalad anka mani kwen ukchajulmal, pemal-Filipos-tolganbi anka mani wis ukchamal. ¹⁶Tenal an Tesalónica-Macedoniagin ampa maidgin, pemal pato melugus anka mani palmis, an melle immal chulgugal.

¹⁷Tenal an pemalgin mani-kaedgin kwen pinzhejul. Tenal antin, an pei, pemal Pab-neggin pul-ichejul immalmal nikugal.

¹⁸Tenal pemal anka Epafroditobal immal palmialidbal, an unnigualdzhe immalmal nika, tenal immalmal yabli ankin okpin. Tenal pemal anka manipalmialmalad, Pab yer takcha, tule-kugedgin-ega-immal-ukchadyob wawadik-yapan itos.

¹⁹Imi pemalga immal akualmalal, an-Pab-Tummad pela-pela Jesucristo-immalmal-nikadbale, pemalga pél pe-immal-napigujimalad uko.

²⁰Imi annal-Pab-Tummad-annal-pab ilagwen-nadgu otummoledi-kuelen, nabirin. Teobdo.

²¹Tegin pe Jesucristogin-akenanimaladga pe chogo, antin nued mai. Tegin Jesúsgin-kwenamalad-ampak-pukmalad pemalga chogmalmo, emalde nued pukwamalmo.

²²Tegin Jesúsgin-akenanimalad-pukmalad

pemalga pel-kwapa chogmalmo, emalde nued pukwamalmo; tegin Jesúsgin-kwenamalad-Romano-Tummad-César-neggin-pukmalad ampamo.

²³Imi Pab-Jesucristo pel-kwapa pe-purpaga immal-nuegan imakelen, nabirin. Pitomalgu.